

GO TSENYA MO PHUPUNG



Rara wa Legodimo yo o segofetseng, ka Bo—Bolengteng jwa Mowa o o Boitshepo o o setseng o le fano, re atamela Lefoko la Gago le le Boitshepo. Mme le fa ka lentswe le le sa siamang ke leka go ikgogela morago, ke bo ke bua mafoko fela ka bonya le ka nitamo jaaka nka kgona, ke kopela kaelo ya Gago ya Selegodimo le tlotso ya Mowa o o Boitshepo di dire mo gare ga rona bosigong jono. Mme mma Ena Yo o leng mogotlhegotlhe, mma Ena a tseye Lefoko la Modimo a bo a Le neela ka mo pelong nngwe le nngwe, fela jaaka re na le letlhoko. Mma A re fepe bosigong jono, mo dilong tse di molemo tsa Modimo.

² Mme bosigong jono, fa re santse re bua ka Lefoko, mma dipelo tsa rona di bo di le dimaele di le dintsi ka ko Golegotha, kwa Jesu a duetseng tlhwatlhwa eo e e lekanelang tsotlhe e e neng ya batlwa ke dikatlholo tse dikgolo tsa Modimo, go tswa tshimong ya Etene. Mme gompiano mma re lemogeng go re rona re siamisitse mahala ka tsogo ya Gagwe, le ka loso la Gagwe, phitlho, le tsogo.

³ Mme bosigong jono ga re sa tlhole re le ba lefatshe, gone re ne ra rekwa ka tlhwatlhwa ya Madi a a tlhokegang thata a Morwa Modimo. Mme mma rona, ka dipelo tse di le bogang, re lebe ko go Wena bosigong jono, ka monagano le nonofo tsotlhe, le tseo tse re nang natso mo teng ga rona, re bo re Go direle ka pelo e e phepa, e e sa pekwang.

⁴ Go dumelele bosigong jono, Rara, fa go tlaa nna le bangwe fano ba ba sa Go itseng, mo go itshwarelweng ga boleo jwa bona, mma bona bosigong jono ba tle ka boikobo ko sefapaanong, mme foo ba ipobole maleo a bona ko Modimong yo o tshiamo, go itshwarela. Mme mma jona bo nne bosigo jo bogolo jwa rona rotlhe. Re kopa gona mo Leineng la Morwa wa Gago, Morena Jesu. Amen.

⁵ Jaanong re a lemoga gore ga go mongwe ope, mo lefatsheng, yo o kgonang go lekane go tsaya Lefoko la Modimo a bo a Le senola, ka gore Lefoko le kwadilwe ka tlhotlheletso. Mowa o o Boitshepo ke Mokwadi wa Lefoko.

⁶ Mme erile mongwe a ne a senkwa, ko Legodimong, go tsaya Buka le go kanolola Dikano, go ne ga seka ga fitlhelwa ope ko Legodimong, kgotsa mo lefatsheng, kgotsa ka fa tlase ga lefatshe, yo o neng a tshwanelwa go kanolola Dikano, kgotsa le e leng go lebelela mo Bukeng. Mme go ne go le Kwana Foo e e neng e bolailwe esale motheong wa lefatshe, mme O ne a tla a bo a tsaya Buka mo seatleng sa Ena yo o neng a dutse mo Teroneng, mme a kanolola Dikano le go phutholola Lefoko.

7 Mme bosigong jono rona re a dumela ebile re tshepa mo go Ena, gore O tlaa re bulela Lefoko, mme jaanong jaaka ke bala mo kgaolong ya bo 2 ya ga Ditiro.

8 Jaaka ke ne ka bega, bosigo jwa ntlha e ne e le *Go Tla Ga Bobedi*, mme. . . jwa ga Morena Jesu, e leng Laboraro. Mme bosigo jwa Labone e ne e le ka *Setlhabelo se se Lekanetseng Gotlhelele*. Mme Labotlhano bosigo e ne e le ka *Tetlanyo e e Lekanetseng Gotlhelele; E E Feletseng*. A lo ne lwa e tlhaloganya bosigo jwa maabane? *Itekanetse*, ka foo re ka kgonang go nna ba ba tlhokang molato ebile re itekanetse go se pelaelo epe mo matlhong a Modimo! Mme bosigong jono e ka *Go Tsenya Mo Phupung*. Mme kamoso, *Tsogo*. Fela jaaka malatsi a latela.

9 Jaanong ke tlhophile bosigong jono, go nna palo ya me ya Lekwalo, go tswa mo Bukeng ya ga Ditiro, kgaolo ya bo 2 le ditemana tsa bo 25, bo 26, le ya bo 27, di akareditswe. Mme Lona le balega jaana, Petoro a bua.

Dafita, gone Dafita o ne a bua ka ga ena, ke ne ka bona Morena fa pele ga me ka gale, ka a le ka fa letsogong la me le le jang, gore ke se theekele:

Ka moo pelo ya me e ne ya itumela, mme loleme lwa me lwa ipela; mo godimo ga moo nama ya me e tlaa ikhutsa mo tsholofelong:

Ka gone ga o kitla o tlogele mowa wa me wa botho mo diheleng, le gona ga o kitla o leseletsa Moitshepi wa gago a sennnga ke go bola.

10 A temana e ntle ya bosigong jono, gore re tlhaloganye seemo sa ka ga Ena a le mo phuphung.

11 Selo sa ntlha se re eletsang go se leba. . . go ngokela kelotlhoko ya lona ko go sone, ke bosenang phoso jwa Lefoko la Modimo. Modimo o tshegetsatsa Lefoko la Gagwe, tlhaka nngwe le nngwe. Mme bosigong jono re batla go bofelela dikakanyo tsa rona mo go seo, gore Modimo o tshegetsatsa Lefoko la Gagwe. Re ka tlhomama gore sengwe le sengwe se Modimo a neng a se bua mo Lefokong la Gagwe, go bo e le Boammaaruri. Mme tumelo ga e itshetlele mo metlhabeng e e fetogang ya dikakanyo tsa motho kgotsa dithuto tsa tumelo tsa motho, fela e na le bonno jwa yone jwa bofelelo mo Lefikeng le le sa suteng la Lefoko la Modimo la Bosakhutleng.

12 Lefoko! Fa Modimo a ne a go bua, moo ke Boammaaruri ka bosaengkae. Le ka motlha ope A ka se kgone go go busetsa morago a bo a re, "Ga ke a go kaya." Nka bua dilo le wena o ka bua dilo, re tloge rona re tshabelelwe ke go tshwanela go di busetsa morago, ka gone re go buile ka kitso ya rona e e botoka go feta thata le bokgoni jwa rona jo bo gaisang go feta. Fela, go raya gore, Modimo o farologane le rona thata go feta. Ena ke yo o senang selekanyo, ke gona ka moo Ena a sa bueng selo se le sengwe fa e se gore sone se itekanetse go sena pelaelo epe. Ga

a ke a tshwanela go se busetsa morago, ga a ke a tshwanela go ikopela maitshwarelo ka ntlha ya se A se buileng. Sone se tlhola se eme e le, Boammaaruri.

¹³ Le e leng Jesu, mo metlheng eno e megolo e re leng mo ketekong, motlhang Modimo ka nnete a neng a bolaya Morwae ka ntlha ya maleo a lefatshe, go ne go le motlhamongwe dikete tsa dinyaga pele le e leng motheo o ne o ka ba wa bewa. Modimo o ne a bua Lefoko, mme Leo ke maduo a a feditsweng ko Legodimong motlhang Modimo a se buang; sone se setse se feditswe. Ao, fa fela re ne re ka tlhaloganya se moo go se kayang, a batho ba ba farologaneng ba re neng re tlaa nna bona! Go bona mo Dibukeng tsa Gagwe, dikatlhola tse di beetsweng ba ba senang kutlo teng mona, gone go ne go tlaa dira motho a itlhatlhobe, oura le oura; mme go ne go tlaa dira basiami ba ipele, oura le oura, go bala ditshegofatso tse Modimo a neng a di solofetsa ba ba ikanyegang. Mme re ka tlhomama gore go tlaa diragala gore Lefoko lengwe le lengwe le diragatswe, re kgogetseng fela mowa wa rona wa botho mo go gone. Go nnile ka gale go le ka tsela eo.

¹⁴ Erile Modimo a ne a bua le Noa, kgakala morago ko lefatshe la morwalela; gongwe kooteng pele ga Baebele e ka ba ya kwadiwa, kgotsa Baebele ena, ka tsela nngwe fela, e neng e ka ba ya kwadiwa; Modimo o ne a bolelela Noa go ne go tlaa letsubutsubu, mme metsi a ne a ile go khurumetsa lefatshe. Mme ntle le tlhaka e le nngwe ya bosupi gore go tlaa diragala, sengwe le sengwe se ganetsanya thata, Noa a tlhotlheleditswe ke poifo, a bo a aga areka, a e baakanya. E ne e le ya go pholosa lelwapa la gagwe le ena. Modimo ga a ka a mo swabisa, ka gonne e ne le Lefoko la Gagwe. Go ne go tshwanetse go diragala fa Modimo a ne a rile go tlaa diragala.

¹⁵ Jaanong, motlhang Jobe, Buka e kgologolo go feta mo Baebeleng, e e neng ya kwadiwa motlhamongwe pele ga Genesi e kwadiwa, mme e ne ya tsenngwa ka mo Baebeleng. Mme Moshe o ne a kwala Genesi. Jobe, mo Bukeng ya gagwe, o ne a itshetletse ka tlhoafalo mo tsholofetsong e Modimo a mo diretseng. Mme o ne a tshegetsatsa setlhabelo sa gagwe sa phiso, go sena poifo mo pelong ya gagwe; a neng a itse gore, se Modimo a neng a se buile, Modimo o ne a kgona go se diragatsa. Mme erile sengwe le sengwe ekete se ne se ganetsaya, Jobe o ne ema ka nitamo ka gonne tsholofetso ya Modimo e ne e nitame. Modimo o ne a solofeditse Jobe, mme Jobe o ne a itshetletse mo tsholofetsong eo.

¹⁶ Ao, fa kereke e ne e ka ba ya kgona go fitlha kwa lefelong leo kwa e ka kgonang go itshetlela ka tlhoafalo mo goreng Lefoko la Modimo la Bosakhutleng ke Boammaaruri! A pharologanyo e moo go tlaa nnang yone, a go gakololweng mo go neng go tlaa nna gone, a go lomololweng mo go neng go tlaa nna gone, a boipelo jo bo neng bo tlaa nna gone, a thata e e neng e tlaa nna gone, motlhang banna le basadi ba neng ba tlaa tsaya Modimo ka se a

bonalang kgotsa a utlwegang a le sone, gore se A se buileng ke Boammaaruri. Go sa kgathalesege ka fa diemo di lebegang ka teng, moo ga go na sepe go dirisana le gone. Modimo o rile jalo; moo go a go rarabolola!

¹⁷ Mme Jobe, motlhang a neng a le mo nakong e e bokete thata ya boitemogelo jwa gagwe jotlhe; motlhang a neng a fitlhelwa, mo Bolengteng jwa Modimo, a le monna wa mosiami. Le e leng Modimo o ne a re o ne a itekanetse. Go ne go se ope yo o tshwanang nae mo lefatsheng. Mme Satane o ne a neelwa tshiamelo ya go mo leka, a neng a re, “Ke tlaa mo dira gore a Go hutse mo sefatlhegong sa Gago.”

¹⁸ Mme ena o batlile a tsaya botshelo jwa ga Jobe, mme a ka bo a go dirile, fela Modimo o ne a thala mola wa molelwane, ne a re “Wena o ka mo dira sengwe le sengwe, fela o seka wa tsaya botshelo jwa gagwe.”

¹⁹ Ga tloga ya re Jobe a ne a eme fa go raelweng ga motsotso o o bothokwa, o ne a re, “Ke a itse gore Morekolodi wa me o a tshela, mme kwa metlheng ya bofelo O tlaa ema mo lefatsheng. Le fa diboko tsa letlalo di tlaa senya mmele ona, le mororo mo nameng ya me ke tla bona Modimo.” Go sa kgathalesege ka foo go neng go lebegang go le lefifi ka teng, le ka foo go neng e ka re ga se ga mmannete ka teng, go ne go na le sengwe se Jobe a neng a kgoetsa mowa wa gagwe wa botho mo go sone, tsholofetso ya Modimo ya Bosakhutleng. Ao, fa fela re ka kgona go dira seo! Lemoga, o ne a itshetletse mo tsholofetsong, “Ke a itse Morekolodi wa me o a tshela.”

²⁰ Mme ke batla o lemogele, mafoko a isago a ke eletsang go a bua, Jobe o ne a nopola lefelo la gagwe la phitlhelo. Mme erile Jobe a swa, o ne a fitlha fela jalo.

²¹ Go ne go na le monna yo mongwe, ka leina la ga Aborahama, yo o neng a dumela Modimo ka fa Lefokong la Gagwe. Mme o ne a dumela Modimo. Mme o ne a bitsa dilo tseo tse di neng di ganetsanya le tsholofetso e Modimo a neng a mo e file, jaaka ekete di ne di seyo. O ne a dumela Modimo ka fa Lefokong la Gagwe. Mme erile malatsi a fetile, le dibeke le dikgwedi, le e leng dinyaga di fetile, seo ga se a ka sa tshosa Aborahama le bonnyennyane bo le bongwe. Baebele e rile, “Ga a a ka a theekelela, ka tumologo, tsholofetso ya Modimo; fela o ne a ikanyega, a neela Modimo pako.”

²² Motlhang sengwe le sengwe se se neng ekete se, letsatsi lengwe le lengwe, se ne fela motlhofo sa gola go nna bokete go gaisa letsatsi lengwe le lengwe; fela gona le go nna bokoa go feta, Jobe o ne a nna yo nonofileng go feta letsatsi lengwe le lengwe. Ao, a tshepiso e e segofetseng e re nang le yone! Fa bothata ekete bo a gola go dira selo, se Modimo a se solofeditseng, mo go sa kgonegeng go diragala; go na le go tshoga thata, re boele ko lefatsheng, re tlamega gore re emeng go feta re nitame go feta le

ka fa le ka nako nngwe re neng ra ema ka teng, mo go MORENA O BUA JAANA. Go tshwanetse go rarabolole, motlhang Modimo a buang sengwe.

²³ Mme Aborahama o ne a bitsa dilo tseo tse di neng di le teng, jaaka okare di ne di seyo, ka gonne di ne di ganetsanya le Lefoko. Mme motlhang Aborahama a neng a latlhelwa ke mokapelo wa gagwe le mosadi, Sara, morago ga dinyaga di le dintsi ba neng ba tshela ga mmogo, o ne a reka seripa sa lefatshe gaufi le lefelo kwa Jobe a neng a fitlhlwe gona, a bo a fitlha Sara. Ke a ipotsa gore gobaneng? Ba ne ba le baporofeti! Ba ne ba bone! Ba ne ba golagana le Modimo! Mme jaanong motlhang Aborahama a neng a swa, o ne a fitlha le Sara.

²⁴ Jaanong, o ne a se batle bagoma bao go mo naya seripa seo sa lefatshe. O ne a se reka, fa pele ga bapaki. A setshwantsho se sentle sa kolobetso. O ne a se reka, fa pele ga bapaki, gore se ne se le sesagagwe. Ao, eo ke tsela e modumedī wa mmatota a tshwanetseng go tla ka yona, eseng go ngongwaelela ko kkgometsong, fela go ema fa pele ga bapaki, “Nna ke mopaki wa Morena Jesu, le wa Mowa o o Boitshepo, le wa ditiro tsa Gagwe tse dikgolo,” le mo gontsi go feta jaaka re bona letsatsi le le bosula lena le atamela.

²⁵ Mme erile morwa Aborahama, yo a neng a le Isaka, tsholofetso e e neng a tla go e neelwa. Mme erile Isaka a ne a swa, o ne a fitlha le Aborahama. Mme Isaka o ne a tsala Jakobo.

²⁶ Mme erile Jakobo a ne a swa, kgakala golo ko Egepeto. Fela lemoga, pele ga a ne a swa, o ne a bolelela morwae wa moporofeti, Josefa, “Tlaya kwano, morwa, mme o beye seatla sa gago mo godimo ga noka ya me e e golofetseng.” Gonne gakologelwang ka foo a neng a golafetse ka teng, ke ka gonne Moengele wa Morena o ne a ama noka ya gagwe, a bo a tlhotsa go tloga letsatsing leo go tswelela. O ne a re, “Baya seatla sa gago mo nokeng ya me, mme o ikanele ka Modimo wa borraetsho, gore wena ga o tle go mphitlha golo fano mo Egepeto.” Goreng? Ao, ba ne ba na le Lefoko, ba ne ba na le tshenolo!

²⁷ Mme mma ke khutleng fano, go bua gore kereke ya Modimo yo o tshelang e agilwe mo godimo ga tshenolo ya Semodimo; eseng mo lekokong, lekgotleng, eseng mo ditumelong tsa kereke kgotsa dithutong tsa kereke, fela mo Boammaaruring jo bo senotsweng jwa Modimo yo o tshelang.

²⁸ Abele, ko tshimong ya Etene, o ne a na le yone motlhang kereke e neng e simolola. O ne a itse jang go tlisa kwana? Gobaneng a ne a seka a tlisa maungo jaaka Kaine a dirile? Fela go ne go mo senoletswe!

²⁹ Jesu o ne a bua gangwe, a re, “Motho a re Nna Morwa motho ke Mang?”

“Bangwe ba ne ba re Wena o ‘Moshe,’ le ‘Elia,’ le jalo jalo.”

O ne a re, “Fela lona lwa re Nna ke Mang?”

³⁰ Lo a bona, ga go a itshetlela mo go se mongwe o sele a se akanyang, ke se wena o se itseng go nna Boammaaruri. “Wena wa reng?” Potso eo e tlaa kgatlhantsha mongwe le mongwe wa rona mo sefatlhengong bosigong jono, “Wena wa reng?”

³¹ Mme Petoro ka bofefo o ne a bua, ntle le ketsaetsego e le nngwe, o ne a re, “Wena o Keresete, Morwa Modimo yo o tshelang.”

³² Jaaka Jesu Yo o neng a itse diphiri tsa dipelo tsoatlhe, gonne O ne a se ope o sele fa e se Jehofa a bonatshitswe mo nameng, mme O ne a re, “Go sego wena, Simone, morwa Jonase, gonne nama le madi ga di a go senolela sena, fa e se Rrê yo o leng ko Legodimong a dirileng sena. Mme mo godimo ga lefika lena Ke tlaa aga Kereke ya Me, ebile dikgoro tsa bobipo ga di na go fenya kgatlhanong le Yone.”

³³ Mme rona batho jaaka re tselela re tla, rona Malutere re batla go tsamaya ka tumelo, rona Mamethodisti re batla go thela lošalaba go E fitlhela, lona Mapentekoste lo batla go bua ka diteme go E bona, fela moo ke dimaele di le didikadike di le lesome kgakala le Yone.

³⁴ Yone ke tshenolo ya Semodimo ya Morena Jesu Keresete, Sebelebele sa Botho jwa Gagwe bo bonatshiwa mo pelong, “Mo lefikeng leno Ke tlaa aga Kereke ya Me, mme dikgoro tsa bobipo ga di na go fenya kgatlhanong le yone.” E dira ka boitekanelo le Matheo . . . :24, 5:24, kgotsa Moitshepi Johane 5:24, “Ena yo o utlwang Mafoko a Me, mme a dumela mo go Ena yo o Nthometseng, o na le Botshelo jo Bosakhutleng; mme le ka motlha ga a nke a tsena mo kotlhaong, fela o fetile loso go ya ka mo Botshelong.” Eseng ka gonne o nnile le tsamaiso epe, maikutlo ape; fela ka gonne o nnile le tshiamelo ya go nna le Keresete a go senolelwa go tswa Legodimong, “Mo godimo ga lefika leno Ke tlaa aga Kereke ya Me.”

³⁵ Mme ka ntlha eo, Jakobo, motlhang a neng a swa, morwae o ne a dira gore mmele wa gagwe o phuthelwe, mme o ne a fitlha le Aborahama, Isaka, Sara, le Jobe, ko Mafatsheng a a Boitshepo, ko Palestina.

³⁶ Ka ntlha eo, Josefa, a neng a le moporofeti. O ne a atlega golo ko Egepeto. O ne a itse Modimo. Modimo o ne a Itshenotse ko go ena. Mme erile a swa, o ne a re, “Lo seka lwa fitlha masapo a me golo fano, fela a tsenyeng. . . motlhang. . . Letsatsi lengwe Modimo go tlhomame o tlaa lo etela!” Goreng? O ne a itshetlela ka tlhoafalo mo Lefokong la Modimo ko go Moshe, “Ka dinyaga di le makgolo a le manê ba tlaa direla setšhaba sena, fela Nna ke tlaa ba ntsha.” O ne a itshetletse ka tlhoafalo mo Lefokong.

³⁷ Mme a setshwantsho se se ntle fano, fa lo tlaa lemoga. Mohebere mongwe le mongwe yo o fetang gaufi, ka mokwatla wa gagwe o itailwe go nna botobetobe, ke bagobagobetsi. Mme

erile a leba ko masapong a moporofeti wa gagwe, Josefa, o ne a itse gore letsatsi lengwe ba ne ba ile go tswa. Gonne, masapo ao a ne a tlogetswe foo go nna segopotso, gore letsatsi lengwe bona ba tlaa tswa.

³⁸ Go nnile go ka batla go nna dinyaga di le lesome le botlhano kgotsa lesome le boferabobedi tse di fetileng motlhang Billy Paulo, mosimane yo monnye a ka nna bogolo jwa dinyaga di le botlhano, ka boutsana tse di kalo. . . Re ne ra nna le sethunya se sennye se re neng re se isa kwa phuphung ya ga mmaagwe, ka mahube mosong mongwe, ka Paseka, fela fa letsatsi le ne le tlhaba, le tlhaga; kgotsa fela pele ga tlhabo ya letsatsi, go ne go ntse jalo, morago re ya ko tirelong. Mme jaaka re ne re fologela ko phuphung, mogoma yo monnye o ne a rola hutshe ya gagwe fa re ne re tsamaela go ya kwa kgaitsadie yo monnye le mmaagwe ba neng ba fitlhilwe gona. Mme o ne a simolola go tsidifala le go lela, mme o ne a re, “Ntate, a mmê o kwa tlase kwa ko khuting eo?”

³⁹ Ke ne ka re, “Nnyaya, morwa. Ga a kwa tlase koo mo lefuting leo. Ena o botoka go gaisa thata go ntsifaditswe ka didikadike go feta wena le nna.”

O ne a re, “A nna ke tlaa bona mmê gape?”

⁴⁰ Ke ne ka re, “Ka letlhogonolo la Modimo, fa o go eletsa, wena o ka kgona go mmona gape.”

Ne a re, “A mmele wa gagwe le ka nako epe o tla tswa golo mo phuphung ena?”

⁴¹ Ke ne ka re, “Moratwi, tswala matlho a gago, mme ke tlaa go bolelela polelo e nnye. Dinyaga di le dintsi tse di lekgolo tse di fetileng, mosong ono, go ne go na le phuphu e e neng ya tlogelwa e le lolea.” Ke ne ka re, “Yone ke segopotso. ‘Gonne bao ba ba robetseng mo Modimong Keresete o tlaa ba tlisa le Ena motlhang A tlang.’” Go sena moriti wa pelaelo, ke itshetlela ka tlhoafalo mo tsholofetsong ya Bosakhutleng ya Modimo!

⁴² Jaaka Jobe wa bogologolo, motlhang re utlwang eo “molora ko moloreng, le lorole ko loroleng,” e nkgopotsa ka ga Longfellow, yo o neng a re:

O se mpolele, mo dinomoreng tse di
hutsafetseng,
Botshelo ke fela toro e e lolea!
Mme mowa wa botho o sule o o robalang,
Mme dilo ga di jaaka ekete di ka gona.

O ne a re:

Eya, botshelo ke jwa nnete! Botshelo ke jo bo
tlhwaafetseng!
Mme phuphu ga se boikaelelo jwa jone;
Gonne lorole o lone, mme o tlaa boela loroleng,
Go ne go sa buiwa ka ga mowa wa botho.

43 Ba o bitsa mmele wa lefoko, gore motlhang rona re tlogang fano re tsena ko gongwe go sele. Le fa go ka nna eng e e kwa go ka nnang yone, ke tsaya Lefoko la moapostolo, fa a ne a re, “Fa motlaagana ona wa selefatshe kgotsa lefelo la bonno le senngwa, rona re na le lengwe le le setseng le letile, go tloga mo go *leno* go ya ka ko go Leo.”

44 Aborahama, Isaka, Jakobo, Jobe, baporofeti botlhe, ba ne ba tshepa ebile ba dumela gore go ne go tla tsogo, gore Morekolodi o a tla. Ba ne ba porofeta ka ga Ena. Enoke o ne a porofeta ka ga Ena; a itshetlela ka tlhoafalo, a kanela bopaki jwa gagwe ka gone. Isaka, Jakobo, Daniele, Jeremia, Hesechiele, ba ne ba itshetlela ka tlhoafalo mo nakong e Mesia a neng a tlaa tla.

45 Mme ba ne ba swa ebile mewa ya bona ya botho e ne ya ya ka ko Paradeising. Ba ne ba sa kgone go ya ko Bolengteng jwa Modimo, ka gonne (re nnile le gone bosigo jwa maabane) gore madi a dipoo le dipodi a ne a sa kgone go itshwarela maleo; one a ne fela a khurumetsa maleo, a neng a bua ka ga letsatsi la nako ya Setlhabelo se se itekanetseng; gobane madi ka mo phologolong a ne a sa kgone go boela morago mo moobameding, gonne ka nako eo o ne a tlaa se tlogele go ntsha ditlhabelo tsa mohuta oo.

46 Fela erile Morwa Modimo a ne a swa, Botshelo jo bo neng bo le ka mo go Ena bo ne bo se bope bosele fa e se Modimo, go boela morago le go re tsaya jaaka bangwe ba gagwe ka mo lelwapeng la Modimo. Mme jaanong rona re bana ba Modimo, Botshelo go tswa mo Mading a Gagwe.

47 Jaanong lemogang ka bonako, jaaka re latela. Motlhang kwa morago ko Kgolaganong e Kgologolo, mme bao ba ba dumetseng ebile ba obamela, mme ba swela mo Tumelong, ba letetse nako eo. Lebaka le baporofeti bao ba neng ba dira seo, mme ba ne ba batla go fitlhwa ko Palestina, ba ne ba itse gore tsogo e ne e sa tle go diragala ko Egepeto. E ne e ile go diragala ko Palestina, a le nosi.

48 Leo ke lebaka ke boelang bosigong jono: Ke na le mehuta yotlhe ya maina; ga ke kgathale gore batho ba mpitsa eng, moo ga go reye sepe mo go nna. Selo fela se nna ke batlang go se dira, ke go itse sena: gore ke nnile ke sule, mme botshelo jwa me bo fitlhilwe mo go Keresete, ka fa Modimong, mme bo kanetswe ka Mowa o o Boitshepo; gore motlhang Ena a mpitsang go tswa baswing, ke tlaa araba mo letsatsing leo. Mpolokeng mo go Keresete, ka gore bao ba ba leng mo go Keresete Modimo o tlaa ba tlisa le Ena mo letsatsing leo.

49 Re tsena jang mo go Keresete? Bakorinthe ba Ntlha 12:13, “Ka Mowa o le mongwe re kolobeleditswe rotlhe ka mo Mmeleng o le mongwe, mme ra fetoga go nna banni ga mmogo ba Puso ya Modimo.” Re ipolela go nna basepedi ba sedumedi le baeti mo lefatsheng lena, ka nako eno, re sa senkeng dilo tseno sa selefatshe, fela re lebile ko go tlang ga Kgosi e e segofetseng e

e tlang go tsaya puso, go tloga lewatleng go ya lewatleng le le sa beelwang molelwane, motlhang A tlang mo kgalalelong ya Gagwe. Ammaaruri, re solofetse go Tla ga Gagwe.

⁵⁰ Mme ka ntlha eo go se na pelaelo epe mo monagagong wa me, fela seo ke se Jesu a neng a na naso mo monaganong wa Gagwe fa A ne a le fano mo lefatsheng, go ne go le bosenang phoso joo jwa Lefoko la Modimo la Bosakhutleng. Gonne, re a itse gore mo go Ena go ne go agile Mmele wa Bomodimo ka botlalo. Bomodimo jo bo feletseng bo ne bo le mo go Ena. O ne a le boobararo Rara, Morwa, le Mowa o o Boitshepo, fela ba ne ba agile mo popegong ya motho; mmele wa Modimo wa lefoko, setshwano se segolo sa Modimo se A dirileng motho mo go sone, a bo a mmaya mo lefatsheng. O ne a na le mmele. Modimo ga se yo o senang mmele. Modimo o na le mmele, mme o lebega jaaka motho. Moshe o ne a o bona, bangwe ba ne ba o bona, mme o lebega jaaka motho.

⁵¹ Mme ke fela setshwano, *ona* ke sone, sa e Oo o leng sone. Mme sengwe le sengwe mo lefatsheng, bontle, botshe, bontle jwa lefatshe, ga se sepe se sele mo lefatsheng fa e se karabo go se se botoka go feta thata thata go na le seo, se se re letileng motlhang re tlogelang lefatshe lena. Gonne, sengwe le sengwe mo lefatsheng ke fela sekaelo sa se se leng ko Legodimong. Sengwe le sengwe se se molemo, sengwe le sengwe se se siameng, sengwe le sengwe se se sentle, ditlhare, dinonyane, sengwe le sengwe, ke fela sekaelo sa se se leng ko Legodimong.

⁵² Botshelo jo e leng jwa rona ke fela sekaelo. Ke fela moriti, mme ga se selo sa popota. Ke letlhakore le le supegetsang selo sa popota. Go tsaya loso go feleletsa setshwantsho, go re busetsa ko mmeleng wa lefoko o rona re tswang ko go one. Ka ntlha eo ko tsohong re tla mo setshwanong sa Gagwe, mmele o o tsoitsweng. A Boammaaruri jwa tlhoafalo jwa Lefoko la Modimo la Bosakhutleng le lentle; eseng fela le lentle, fela ke la ga mmannete, gore rona re tlaa nna jaaka Ena.

⁵³ Lemoga jaanong, Jesu, a abetswe ka dithata tsotlhe tsa Modimo, fela, erile A kgatlhana le Satane, ga A a ka a dirisa sepe sa dithata tsa Gagwe. O ne fela a umaka ka Lefoko! O dirile. O ne a re, "Go kwadilwe, 'Motho a ka se tshele ka senkgwe se le sosi, fela ka Lefoko lengwe le lengwe le le tswang mo molomong wa Modimo.'"

⁵⁴ Ka ntlha eo o ka bua jang wa re o ka dula gae mme wa nna fela jaaka Mokeresete o o siameng jaaka o tlaa nna ka teng ko kerekeng? O ka se kgone go go dira. Bala Lefoko! Mowa o o Boitshepo o fepa mo Lefokong. Baebele ke dijo tsa semowa tsa Modimo tse di faphegileng tsa Kereke ya Gagwe. Mme Mowa o o Boitshepo ke Ena Yo o Le tlišang ko go wena a bo a Le baya mo pelong, mme e le ka go neela ditebogo wena o a Le nosetsa. Mme tsholofetso nngwe le nngwe ya Selegodimo e tlaa ntsha totatota

se Modimo a buileng gore e tlaa se dira. E tshwanetse go dira. Ke Lefoko la Gagwe, mme Ke Botshelo.

⁵⁵ Jaanong, nna ke lebetse gore ke ne ke tshwanetse fela go nna le halofo ya oura. Go ntsaya bolelee jo bo kana go fitlha kwa go se ke batlang go se bua.

⁵⁶ Fela lemogang Jesu mo oureng ya bofelo, kgotsa di le pedi, tsa botshelo jwa Gagwe, diporofeto di le dintsi, ntsi di ne tsa diragatswa.

⁵⁷ Mongwe o ne a nthaya a re, “Mokaulengwe Branham, *sena* se tshwanetse se diragale, le *sele* se tshwanetse se diragale.”

Ke ne ka re, “Go ka diragala mo oureng.”

⁵⁸ Fa wena o tlaa bala Pesalome ya bo 22, mme wa tloga wa lebelela oura ya Gagwe ya go swa mo sefapaanong, nna ke lebala fela ke diporofeto di le kae tse di bonagalang tse di neng tsa diragatswa mo dioureng di le pedi kgotsa di le tharo tsa botshelo jwa Gagwe! Ammaaruri, “Ba ne ba tlhaba dinao tsa Me le diatla tsa Me. Modimo wa Me, Modimo wa Me, gobaneng Wena o Ntlogetse?” le jalo jalo, jaaka Dafita a ne a goa.

⁵⁹ Mme go tloge selo se sengwe se nna ke batlang o se lemoge, Boammaaruri, karolo e e senang phoso ya Lefoko la Modimo. Baebele e ne ya re, “O boloka masapo a Gagwe otlhe, ga go le le lengwe la one le le robilweng.” Gonne mo setshwantshong, kwanyana ya paseka e ne e le setshwantsho sa gone. Kwanyana e tshwanete e nne e e senang bogole, go se nne le masapo ape a a robegileng mo kwanyaneng. Mme oura ya nako E a neng. . . A neng a swa, ba ne ba ya go roba maoto a Gagwe ka hamola. Mme fela pele ga. . . Lebang ka one motsotso o o botlhokwa tlhokwa oo! Monna ka hamola, a itlhwatlhwaeditse go itaya dinao tsa Gagwe, fela Lefoko la Modimo le ne la re, “Ga go na go ba le lesapo le le lengwe le le robilweng mo mmeleng wa Gagwe.”

“Go ile go diragala jang?” Re tsena mo boitlhaganelong.

⁶⁰ Lefoko la Modimo ke la Bosakhutleng! Fa Lefoko la Modimo le itekanetse jalo, bona ba ba leng mo go Keresete go tlhomame ba tlaa tsoga ka go na le tsogo. Modimo o tlamegela tiragatso ya Lefoko la Gagwe, go go fodisa, jaaka A tshwanetse go go pholosa. Gonne, Ena, ke Lefoko la Gagwe le le go solofeditseng. Ke Lefoko la Modimo, mme rona ga re na tshwanelo ya go ntsha mo go Lone. Fa e se go re, “Ke Boammaaruri.” Le dumele! Go sa kgathalesege se se diragalang, Le dumele, ntswa go le jalo. Eo ke tsela e botlhe ba bona ba neng ba tshwanela go Le dumela ka teng, mme rona ga re a kgethololwa mo go seo. Modimo o ne a neela Palestina ko go Iseraele, fela ba ne ba tshwanela go tlhabanela intshi nngwe le nngwe ya lefatshe le ba neng ba le thopa. Tsholofetso ke ya gago, fela wena o tshwanetse go tlhabanela intshi nngwe le nngwe e o e dirang segagago; diabololo o tlaa tlhomamisa gore go nne jalo, ammaaruri o tlaa dira.

61 Fela lemoga gore fa ba ne ba ipaakantse go roba maoto a Morena wa rona Jesu, fa hamola eo e ne e tla bo e iteile lekoto ya bo e le roba, Modimo o ne a tlaa bo a fitlhetswe a le maaka. Fela go ne go se bodiabolo ba ba lekaneng mo tlhorontshong yotlhe e e lefifi go dira gore hamola eo e itaye mmele oo o o botlhokwa go feta. Gonne Dafita, dinyaga di le makgolo a le boferabobedi pele ga nako eo, o ne a re, “Ga go tle go nna le lesapo le le lengwe le le robegileng mo mmeleng wa Gagwe.” Lefoko la Modimo le tshwanetse le eme le le Boammaaruri.

62 Fela ba ne ba dira eng ka nako eo? Ba ne ba tsaya lerumo ba bo ba le tlhomela mo letlhakoreng lwa Gagwe, mme Madi le metsi di ne tsa tswa, go diragatsa se Baebele e neng ya se bua ya re, “Ba tlabile diatla tsa Me le lotlhakore lwa Me.” Lefoko le ne la diragadiwa.

63 Jaanong fa A ne a swa, ao, a oura e e boitshegang! Ke akanya ka ga kopelo eo, mme, ka bopelophepa, yone e ntira fela ke ikutlwe maswe, fa ke akanya kopelo eo e mmoki a e kwadileng dinyaga di le dintsi tse di fetileng.

Fa gare ga mafika a phatlogang le mawapi a a
fifalang,
Mopholosi wa me o ne a obamisa tlhogo ya
Gagwe a bo a swa;
Sesiro se se bulegileng se ne sa senola tsela
Go ya maipelong a Magodimo le letsatsi le le
senang bokhutlo.

64 Mme erile A ne a kaletse foo, a porotla madi ebile a swa, fa A ne a obile tlhogo ya Gagwe, letsatsi le ne la tlhajwa ke ditlhong thata jang, go lebelela fatshe mo godimo ga ditshedi tse di swang tse Modimo a di dirileng mo setshwanong sa Gagwe, gore o tlaa tshwanela go duela tlhwatlhwa e e jalo go le rekolola, letsatsi le ne la gana go lebelela fa fatshe mo lefatsheng mo oureng eo. Ngwedi e ne e tlhakilwe ke ditlhong thata jang go tsamaya e gogela lefelo la yone morago. Mme dinaledi di ne tsa retolosetsa mokwatla wa tsone ko lefatsheng. A selo se se boitshegang se boleo bo tshwanetseng bo nne sone, ka foo Modimo a neng a tshwanela go berekana le jone!

65 Mme go bona baperesiti bao ba ba neng ba sotla, ka mathe a lepelela mo sefatlhogong sa Gagwe. Monna o ne a Mo itaya mo tlhogong, ka letlhaka, a bo a re, “Fa Wena o le Moporofeti, re bolelele ke mang yo o Go iteileng.” Mongwe wa bona o ne a goga ditedu tsa Gagwe go di ntsha mo sefatlhogong sa Gagwe, a bo a Mo faphola mo sefatlhogong, a bo a Mmatla gore a Ikarabele.

66 O ne a re, “Fa Bogosi jwa Me bo ne bo le ba lefatshhe lena, Ke ne ke tlaa bitsa Rrê gone jaanong, O ne a tlaa Nthomelela dikete di le lesome le bobedi tsa batlhabani ba Baengele.”

67 Go ka bo go ne go fetotswe, fela Ena o ne a ka go dira jang? O ne fela a ka se kgone go go dira, gonne e ne e le bana ba e

leng ba Gagwe ba ba neng ba goelela Madi a Gagwe. A wena o ka tshema ntate, rra, le bana ba e leng ba gagwe (mo lefifing) ba goelela madi a e leng a ga rraabo? Leo ke lebaka le A neng a ka se kgone go dira sepe se sele fa e se go swa. Fa A ka bo a sa dira, go ne go le phutso yabana ba Gagwe, go ne go le phutso ya ditshedi. Fela O ne a tshwanela go swa, go pholosa batho ba Gagwe.

⁶⁸ Mme erile A dira, fa A ne a obamisa tlhogo ya Gagwe, lefatshe lena la kgale le ne la nna le motlakaselo o o neng wa siana mo mokwatleng wa lone. Le tshwanetse la bo le nnile le go namalala ga mafafa, gonne Baebele e ne ya re “lefatshé lotlhe, go tloga ka oura ya boratoto go ya go ya borobabongwe, le ne le le lefifi, le ne le le mo godimo ga lefatshé lotlhe le le bonalang.” Mme lefatshé le ne la roroma, mme mafika a phatloga. Mme lesire la tempele le ne la kgagoga go tloga kwa godimo go ya kwa tlase; disana tsa setlhabelo di ne tsa menoga. Morwa Modimo yo o tshelang o ne a sule. O ne a sule thata jang go tsamaya letsatsi le go lemoga. O ne a sule thata jang go tsamaya ngwedi e go lemoga. O ne a sule thata jang go tsamaya dinaledi di go lemoga. O ne a sule thata jang go tsamaya lefatshé le go lemoga. O ne a sule thata jang go tsamaya dikarolwana di go lemoga, mawapi a go lemoga. Sengwe le sengwe se ne se tshwanetse go itse yoo o ne a le Morwa Modimo! Gonne, Lefoko la Modimo le ne le ka se kgone go palelwa, O ne a solofeditse, go tswa tshimong ya Etene, “Peo e e tlaa tlapetlang tlhogo ya noga.”

⁶⁹ Jaanong O diragaletswe ke eng? O ne A ya kae fa A sena go tloga mo sefapaanong a bo a tsena mo phuphung ya ga Josefa wa Aremathea?

⁷⁰ O ne a humanegile thata O ne a se na lefelo la go latsa tlhogo ya Gagwe. O ne a tsalelwa mo bojelong jwa diphologolo, ka leina le le ntsho fa morago ga Gagwe, e le “ngwana wa kwa ntle ga lenyalo.” O ne a tshewa, a diriwa motlae, a sotliwa, mo lefatsheng. O ne a diriwa motlae, ebile a ganwa. Mme erile A ne a swa, O ne a tshwanela go swa ka kotlhaio ya loso, fa gare ga magodu a le mabedi. Mme o ne a sena le e leng lefelo la go Mo fitlha, mme O ne a fitlhiwa mo phuphung ya motho yo mongwe. Ena Modimo wa Legodimo a tla mo lefatsheng! Re akanya gore re bomang, ba re tshwanetseng go ralala go boga mo go nnyenyane? Se A se re diretseng! Akanya ka ga gona, tsala, keleka ka ga gona.

⁷¹ Lesole la Moroma ne la re, “Ammaaruri, yoo ke Morwa Modimo.” Moleofi o ne a tshwanela go go lemoga. Jutase ne a re, “Ke okile Madi a a senang molato.” O ne a tshwanela go go lemoga. Lefatshe lotlhe le ne la go lemoga.

⁷² Ne A tloga a ya kae? Fa motho a swa, a moo go a go fedisa? Nnyaya, rra. O ne a tshwanela go swa ka tsela eo ka gonne Baebele ya Modimo e ne ya re O tlaa swa ka tsela eo. Mme O ne a tshepa Lefoko la Modimo. Leo ke lebaka le A kgonneng go

bua a re, mo botshelong jwa Gagwe, “Senyang tempele ena, mme Ke tlaa e tsosa mo malatsing a le mararo.”

⁷³ Gonne Dafita o ne a bua mo lefelong le le lengwe, fela mo Baebeleng, fa tlase ga tlhotlheletso, motlhang Dafita, monna wa Modimo, moporofeti yo o neng a tloditswe ka Lefoko, ne a re, “Ga Ke tle go letlelela Moitshepi wa Me go bona go bola, le eseng gore Nna ke tlaa tlogela mowa wa Gagwe wa botho ko bobipong.”

⁷⁴ Jesu ne a re, “Lo senye mmele ona, mme Ke tlaa o tsosa mo malatsing a le mararo.” O ne a itse gore Lefoko la Modimo ga le kgone go retelelwa. Ijoo!

⁷⁵ Fa A ne a kgona go itshetlela ka tlhoafalo mo go seo, a dumela gore Lefoko la Modimo le ka se kgone go palelwa, ke ga kae mo go fetang gore rona re ka itshetlela ka tlhoafalo gore re nnile ra tsalwa sešwa ke Mowa o o Boitshepo, ebile One ke mopaki mo dipelong tsa rona gone jaanong gore re a itse gore Morekolodi wa rona o a tshela ebile o tlaa tla gape letsatsi lengwe. Tlhomamang gore go tlaa diragala gore bao ba ba leng mo go Keresete Modimo o tlaa ba tliša le Ena! Jaanong lemogang.

⁷⁶ Ena ke yoo. O ne a itse gore ga go sêlê e le nngwe ya mmele oo e e neng e tlaa bola. Dioura di le masome a supa le bobedi, go bola go a simolola. Leo ke lebaka le Ena le ka gope a sekang a nna malatsi a le mararo. O ne a swa mo tshokologong ya Labotlhano, ne a tsoga mosong wa Letsatsi la Tshipi. Fela, e ne le mo teng ga malatsi ao a le mararo. Mo teng ga malatsi ao a le mararo O ne a tshwanela go tsoga gape, ka gore O ne a ikanya Lefoko la Modimo.

⁷⁷ Ke yona A tloga! O ne A ya kae fa A ne a emelela? Baebele ne ya re, “O ne A tlhatloga. O ne a tsamaya a bo a rerela mewa ya botho e e neng e le ko kgolegolong, e e neng e sa sokologa ko bopeloteleleng jwa metlha ya ga Noa.” Mowa wa Gagwe wa botho, Mowa wa Gagwe, mmele wa Gagwe wa Lefoko wa botho jo e Leng jwa Gagwe, o ne wa ya ko tlase. Nte re Mo saleng morago. A lo tlaa rata go dira, bosigong jono, go Mo sala morago metsotso e le mmalwa? A re boneng kwa A neng a ya gone.

⁷⁸ Fela fa tlase ga mafelo a batho ba ba swang go letse magato a nonofo ya medemone; fa tlase ga foo...fela fa godimo ga moo go letse mewa ya botho ya basiamologi; fa tlase ga lone go letse lefelo la ga Satane, bobipo. Foo fela fa godimo ga rona go letse Mowa o o Boitshepo; foo fa tlase ga Aletare go letse mewa ya botho ya basiami; go tloge mo go latelang e nne Modimo ka Sebele. Le lengwe go ya kwa tlase, le lengwe go ya kwa godimo; mewa e mebedi e mo lefatsheng, e tlhotlheletsa batho ba lefatshe lena.

⁷⁹ Mme erile fa Jesu a ne a swa, O ne a ya golo, kwa tlase koo. Ke kgona go Mmona mo tshokologong eo ya Labotlhano, morago ga loso la Gagwe, [Mokaulengwe Branham o a kokota—Mor.] kokota mo mojakong wa mafelo a balatlhegi. A re Mo lateleng motsotso.

Mojako o a bulega. Go ne go le basadi, go ne go le banna, go ne go le bahumagadi ba banana, go ne go le bagolo, ba ne botlhe ba le mmogo mo lefelong le le maswe leo le le bosula le le bidiwang kgolegelo ya mewa ya botho e e timetseng.

⁸⁰ Fa nka bo ke na le nako, ke tlaa rata go le bolelela. Mme go ka nna fela ponatshegelo. Fela nako nngwe ke ne ka etela lefelo leo, mme ka goeleletsa boutlwelo botlhoko, fa ke ne ke le moleofi ke etse karo. Fa ke ne ke thanya, ke ne ke eme ko Bophirima, ka diatla tsa me di le godimo ntlheng ya Legodimong, le sefapaano se phatsimela mo go nna.

⁸¹ Fela mo lefelong leo la go hutsafatsa koo, Jesu o ne a tsamaela kwa mojakong. Sengwe le sengwe se ne sa tshwanela go supa gore Ena o ne a le Morwa Modimo, ka gore bona ba ntile ba rerelwa mo bopeloteleleng jwa metlha ya ga Noa. A kokota fa mojakong, O ne a re, “Nna ke Ena Yo Enoke a buileng ka ga ena. Ke Nna Peo ya mosadi, e e neng e tla go tlapetla tlhogo ya noga. Lefoko lengwe le lengwe la Modimo le ne la diragatswa; Ke fetsa go swa ka kwale ko Golegotha, mme Ke rekile Kereke ya Me. Mme Yo Enoke a buileng ka ena, ke Nna Ena.” Mme ba ne ba sena boutlwelo botlhoko, ba sena tsholofelo, ka gone ba ne ba tlotse molao. Mme mojakoko o ne wa tswalelwa mo sefatlhengong sa bona.

⁸² Go tswewelega kwa tlase ka ko mafelong a medemone! Go tswewelega kwa tlase ko go tsone dikgoro tsa bobipo! O kokota fa mojakong. [Mokaulengwe Branham o a kokota—Mor.]

⁸³ Mona ke nako e Ena a neng a le mo phuphung, mmele wa Gagwe o, letetse tsogo. O ne a etela mafelo a basiami le basiamologi ba yang gona; kwa wena o tlaa yang gone lengwe la malatsi ano, ko go le le lengwe kgotsa mafelo a mangwe.

⁸⁴ Mme O a kokota [Mokaulengwe Branham o a kokota—Mor.] fa mojakong wa bobipo. Mme, erile A dira, diabololo o a tswa. Mme nna ke kgona fela go mo utlwa a re, “Ao, jalo fa bofelong O gorogile. Nna ke tlhomame ke ne ke akanya gore ke ne ke Go tshotse fa ke ne ke bolaya Abele.”

⁸⁵ Lo a bona, fa Peo eo e ne e solofetswa ko tshimong ya Etene, diabololo o ne kgapetsakgapetsa a leka go senya Peo eo. Mme loso la ga Abele, le go tla ga ga Sethe, e ne fela e le loso, phitlho, le tsogo ya ga Keresete. Peo e tshwanetse e tswewelega. Mme o ne a leka go E senya.

⁸⁶ O ne a re, “Ke ne ka akanya gore ke Go tshotse fa ke ne ke bolaya Abele. Ke ne ka akanya gore ke Go tshotse fa ke ne ke bolaya baporofeti. Ke ne ke tlhomame ke Go tshotse motlhang ke ne ke kgaola Johane tlhogo. Fela jaanong, morago ga tsotlhe, Wena o gorogile. Ke Go tshotse jaanong.” Ijoo!

⁸⁷ Ke kgona go Mo utlwa a re, “Satane, tlaya kwano!” Ena ka Mookamedi jaanong. A otlollela foo, a phamola selotlele seo sa loso le bobipo fa letlhakoreng la gagwe, a se kaletsa mo

lotlhakoreng le e Leng la Gagwe. “Ke batla go go neela kitsiso. O nnele o le setshosetsi lobaka go lekane. Ke nna Morwa Modimo yo o tshelang yo o tsetsweng ke kgarebane. Madi a Me a santse a le metsi mo sefapaanong, mme sekoloto sotlhe se duetswe! Ga o sa tlhola o na le ditshwanelo dipe. Wena o rontshitswe. Nnaye dilotlele tseo!” Go jalo. A retologa a bo a mo raga ka morago o o siameng o o itekanetseng, mme a itaaganya mojako ga mmogo, a bo a re, “Dula teng foo! Nna ke Mookamedi go tloga jaanong go tswela.”

⁸⁸ Jaanong, O ne a sena dilotlele tsa Puso, ka gonne O ne a di neile Petoro; re bona yotlhe eo mo mosong, mo kolobetsong ya metsi. Fela o ne a na le dilotlele tsa loso le bobipo, mme O ne a di tsaya; morago ga tsogo ya Gagwe, O ne a re, “Ke tshotse dilotlele tsa loso le bobipo.” Petoro o ne a na le dilotlele tsa Puso. Satane o ne a tshotse dilotlele tsa loso le bobipo; fela jaanong Jesu o di tshotse, Ena ke Mookamedi.

⁸⁹ Ke fano O a simolola. Go nna Paseka, nako e feta ka bofefo. Fela go na le setlhopho se sengwe. Jobe o kae? Aborahama o kae? Ke kae kwa ba leng gona? Ba kae bagoma bao ba ba tshephileng Lefoko la Modimo? A Ena o ba lebetse? A loso le ne la ba fedisa? A moo go ne go le gotlhe ga gone? Le goka, le goka; Modimo o tshwanetse a tshegetse Lefoko la Gagwe.

⁹⁰ Ke kgona go Mmona. A re okomeleng gannye ka mo Paradeiseng, mme re boneng ka koo. Mme ke bona Sara le Aborahama ba tsamaya tsamaya koo, mme morago ga lobaka [Mokaulengwe Branham o a kokota—Mor.] sengwe se mo mojakong. Aborahama o a ya a bo a bula mojako, ne a re, “Mokapelo, tlaya kwano. Leba fano! Leba fano, ke ene Yo o tshwanang yo neng a ema le nna fa tlase ga moeike letsatsi lele.” Ke Modimo wa ga Aborahama.

⁹¹ Fela ka nako eo ke kgona go bona Daniele a okomela mo godimo ga legetla la gagwe, mme a re, “Leo ke Lefika le le neng la kabolwa mo thabeng, fela ka tlhomamo jaaka ke eme fano.”

⁹² Ke bona Jobe a tthatloga, a re, “Yoo ke Morekolodi wa me yo ke neng ka re ke a itse o a tshela, mme letsatsi lengwe O tlaa ema mo lefatsheng. Mmele wa me o ka nna o se melora e e tlang leso, fela mo metsotsong e e lesome le bothano go tloga jaanong ke tlaa bo ke le ka mo go one gape. Yoo ke Ena.”

⁹³ Hesechiele o ne a lebelela ka kwa godimo, a bo a re, “Ke bone ena Motho yo o tshwanang yoo a le Lekotwana mo gare ga Lekotwana, le dikologa, kgakala kwa godimo mo gare ga loapi.” Ijoo!

⁹⁴ Ka nako eo Enoke o ne a tla. Enoke o ne a re, “Ke Mmone a tla le baitshepi ba Gagwe ba le diketekete di le lesome, go diragatsa katlholo.”

⁹⁵ Moo go ne go le baitshepi ba Kgolagano e Kgologolo ba letile, ka tlhomamo ba ne ba dirile, fa tlase ga tetlanyo ya madi. Ba

ne ba sa kgone go tsena mo Bolengteng jwa Modimo, Modimo wa Legodimo, ka gore madi a dipodi le nku a ne a sa kgone go tlosa bolelo.

⁹⁶ Fela O ne a re, “Bakaulengwe, Nna ke Yena yo lo akanyang gore ke Nna ena. Ke Nna Peo ya mosadi. Ke Nna Morwa Dafita. Ke Nna Morwa Modimo. Ke Nna Yo o tsetsweng ka kgarebane. Madi a Me a go letlanyeditse. Lo letile fa tlase ga madi a dinku le dipodi, fela jaanong Madi a Me a a letlanya, mme lona lo gololesegile. A re tlhatlogeng, go batlile go nna Paseka.” Akanyang fela, moo go ne fela go ka nna dinyaga di le makgolo a le lesome le boferabongwe le sengwe tse di fetileng, bosigong jono.

⁹⁷ Ke kgona go utlwa Aborahama a re, “Morena, fa re tsena golo mo mmeleng wa rona gape; mme Sara le nna re o ratile fela thata thata; a Wena o tlaa se tshwenyega fa re ema nakwana fela gongwe mo mosepeleng, ka mokgwanyana o o rileng, mo tseleng ya Gago?”

⁹⁸ Sentle, ke kgona go Mo utlwa a re, “Goreng, nnyaya, go tlhomame nka seka. Ke ile go nna le barutwa ba Me go ka nna malatsi a le masome a le manê. Re lebeng mo tikologong re boneng ka foo sengwe le sengwe se lebegang ka gona!”

⁹⁹ Mo mosong oo o o galalelang wa Paseka (kwa re tlaa tlogang mo mosong, Morena fa a ratile) motlhang A tlhatlogang mo baswing, Baebele ne ya re, go ya ka Moitshepi Matheo 27, gore “Ba le bantsi ba baitshepi ba ba neng ba robetse mo loroleng lwa lefatshe, ba ne ba tsoga ba bo ba tswa mo diphuphung.” O ne a le mang? Aborahama, Isaka, Jakobo, Jobe, bao ba ka tshenolo ya semowa e e senotsweng ba neng ba itse gore Morekolodi o tlaa ema fa lefatsheng letsatsi lengwe. Bao ke bone, maungo a ntlha a bao ba ba robetseng. Koo ba ne ba tsamaya mo motsemogolong. Ke kgona go bona Sara le Aborahama, ba le banana, mme ba tletse ka . . . e bile ba le bantle, mme—mme ba tletse ka botshelo, ba seka le ka motlha ope ba tsofala gape, ba seka le ka motlha ope ba lwala gape, ba seka le ka motlha ope ba tshwarwa ke tlala gape, ba tsamaya mo tikologong mo mmeleng wa bone.

¹⁰⁰ Khaifase o ne a eme foo, a re, “Lo a itse ke eng? Go sengwe se se neng sa diragala maloba, lebang fela matladika a tempele eno e leng mo go one! Go na le . . . Re ile go tshwanela go nna le mongwe go roka lesiro leo. Lebang tseo, lebokoso la ditlhabelo le menotswe. Go diragetseng? A Moeka yole o ne a le moitseanape wa dinaledi le mafatshe? A O ne a le moloi? Kgotsa, go diragetseng? E reng! Tlaya kwano, Josefase, bobedi jole jwa baratani ke bomang fale?”

Aborahama ne a re, “Sara, re a lemogiwa. Go botoka re tswa.”

¹⁰¹ “Ba bonala ko go ba le bantsi!” Moo go ne go se gotlhe ga gona. Mo go tswaleleng, lebang. Letsatsi lengwe morago ga fa

A ne a . . . ba ne ba etile; Aborahama, Isaka, Jakobo, le botlhe ba bona ba ne ba etela lefatshe la gabone. Motlhang Jesu a ne a tlhatlogela godimo . . .

¹⁰² Lo a re, “Mokaulengwe Branham, a moo ke ga dinaane?” Nnyaya, rra! Ke tlaa go supegetsa mo Dikwalong, mo motsotsong.

¹⁰³ Motlhang A simololang go tlhatloga, ba bone Ena fela, fela baitshepi ba Kgolagano e Kgologolo ba ne ba tsamaya le Ena, gonne Baebele e rile seo “O ne a etelela pele bogolegwa kgolegong, a bo a neela batho dineo.” Mme ke kgona go Mmona fa A tlhatlogela godimo, mme a ipataganya le kereke ya Gagwe.

¹⁰⁴ Baengele ba le babedi ba setlhopha se se neng se tshameka mmino, ba ne ba boela koo, ba bo ba re, “Lona batho ba Galelea, goreng lo eme lo lebile ko godimo? Gonne Ena Jesu yona, yo o neng a tselwa kwa godimo, o a boa gape.” Go tlhomame! Ba ne ba itlhaganela go boa go ipataganya le tlhomagano ya batho.

¹⁰⁵ Mme go tsamaya go ralala mawapi Jesu le baitshepi ba Kgolagano e Kgologolo ba ne ba tsamaya. Ba ne ba feta ngwedi, ba ne ba feta letsatsi, ba ne ba feta dinaledi. Mme erile bona ba fitlha mo ba bonang Magodimo a Masweu a Magolo ao, a a mantle, baitshepi ba Kgolagano e Kgologolo ba ne ba goeletsa, ba nopola Lekwalo, “Bulegang, lone dikgoro tsa bosakhutleng, mme lo bulegeng! Bulegang, lone dikgoro tsa bosakhutleng, mme lo bulegeng! Mme lo tlogeleng Kgosi ya Kgalalelo e tseneng!”

¹⁰⁶ Baengele botlhe ba na ba phuthegela golo mo godimo ga magora ao a direpodi tsa Legodimo, ba bo ba re, “Kgosi ena ya Kgalalelo ke Mang?”

¹⁰⁷ Baitshepi ba Kgolagano e Kgologolo ba ne ba re, “Morena wa masomosomo, mothati mo tllhabanong! O ne a le Mofenyi!”

¹⁰⁸ Moengele o ne a tobetsa konopo e kgolo, mme dikgoro tsa ditalama di ne tsa akgega tsa bulega.

¹⁰⁹ Gone go fologa ka Motsemogolo wa Jerusalema go ne ga tla Mofenyi yo o mogolo, wa mothati, a tllisa baitshepi ba Kgolagano e Kgologolo. Ditlhopha tsa mmino tsa Baengele di ne di tshameka, fa ba Baengele ba ne ba thela lošalaba. O ne a le Mofenyi seganka! O ne a tshotse dilotlele tsa loso le bobipo di kaletse mo lotlhakoreng lwa Gagwe, a tsamaya gone go fologa ka mešate ya Kgalalelo go tsamaya A fitlha ko Sedulong sa Bogosi. Mme O ne a re, “Rara, bona ke bano. Ba ne ba dumela, ka tumelo mo Lefokong la Gago, gore Nna ke tlaa tla lengwe la malatsi. Nna Ke fentse tsoopedi loso le bobipo.” E ne e le eng, mokaulengwe? O ne a na le mabadi mo seatleng sa Gagwe, go supegetsa gore O ne a le mo tllhabanong. Kgalalelo ko Modimo ko Godimodimo! Ena ke Mofenyi yoo wa seganka! “Bona ke bano, Rara; Aborahama, Isaka, le Jakobo.”

110 Ke kgona go Mo utlwa a re, “Morwa, pagamela golo fano mo lotlhakoreng lwa Me, o bo o dula fatshe go tsamaya Ke dira mmaba mongwe le mongwe sebeo sa Gago sa dinao.” Mokaulengwe, letsatsi lengwe O tlaa tla gape, mme a letsatsi le leo le tlaa nnang lone!

111 O ne a se yo o tlhokang tiro nakong e A neng a le mo phuphung. Re akanya gore O ne fela a letse foo, a sule. Fela O ne a le ko tlase a santse a fenya, O ne a ya ko tlase a bo o a tsaya dilotlele mo go Satane, O tshotse dilotlele tsa tsoopedi loso le bobipo, bosigong jono. O ne a re, “Ka gonne Ke a tshela, lo kgona go tshela, le lona.”

112 Ke a ipotsa bosigong jono, mokaulengwe wa me yo o rategang, bokgaityadi, a lo kile lwa akanya ka ga seo ka bopelophepa? A lo a lemoga gore lona lo tshela fela ka gore Ena o a tshela? A lo leboga seo mo go lekaneng gore lo ineeleng, lo be lo re, “Modimo, nna ke fano, moleofi, nna le boutlwelo botlhoko mo go nna?” A le ka nako nngwe lo kile lwa amogela Setlhabelo seo se se lekanelang tsotlhe? A lo ka nako nngwe lo kile lwa Mmolela gore lo a Mo rata? A go utlwisa maikutlo a gago botlhoko fa o dira phoso? Fa o ise go tle mo maitemogelong ao jaanong, mo go tsenngweng mona mo phuphung! Motlhang, nako ya rona e fetang. Fela go ikutlwa o siame! Fela, ke a ipotsa, fa o ise wa amogela Keresete go nna Mopholosi wa gago ka bonosi, ke a ipotsa fa o tlaa go dira fa re santse re obamisa ditlhogo tsa rona fela motsotso mo lefokong la thapelo.

113 Tshameka eo, *Fa gare ga Mafika a a Phatlogang*, fa o tlaa dira, Kgaityadi Gertie, fa o na le yone. Go siame, sengwe le sengwe se tlaa siama.

114 Ka ditlhogo tsa rona di obamisitswe, ke ile go lo botsa potso e e tlhoafetseng ka nnete. Gakologelwang ditsala, moleofi kgotsa moitshepi, wena ga o a tswa mo go tsheleng motlhang re go fitlhang. Mowa wa gago wa botho o golo gongwe. Jaanong, Jesu o ne a etela mafelo a mabedi ao, go ya ka Dikwalo. Ke kae kwa Ena a tlaa go fitlhelang gone fa wena o tlaa tsamaya bosigong jono? A o tlaa nna le mojako wa boutlwelo botlhoko o tswaleletswe mo sefathegong sa gago, ka gore wena o ne wa gana? Gakologelwa, Ena ga se fela Mopholosi, Ena ke Moatlhodi. Wena o moatlhodi jaanong, wena o Mo athlola jang? Mo letle A nne Mopholosi wa gago jaanong.

115 Polelo e nnye e tla mo monaganong wa me. Nako nngwe e e fetileng mosimane yo monnye o ne a dutse mo kgo—kgothokgothong. Tlhobolo e ne ya fula golo mo mmileng, mme dipitse di ne tsa tabogela kgakala mme di ne di ya go wela ka kwa ga mhapha wa thaba. Modisa dikgomo wa monana o ne a taboga a bo a emisa dipitse pele ga kgothokgotho e wela ka mhapha wa thaba, ka gore e ne e na le ngwana yo monnye ka mo go yone. O ne a pholosa botshelo jwa yo monnye.

116 Dinyaga di le dintsi morago ga moo, a eme mo kgotla tshekelong. Mosimane yena yona o ne a dirile borukhutli, a tsere tsela e e fosagetseng, a le molato. O ne a nwa nnotagi, a betšha, a futse monna; mme a ne a le molato, a fitlhelwa a le molato. Mme moatlhodi o ne a tlhatloga a bo a re, “Ke go athlola gore o kaletswe ka thamo ya gago go tsamaya botshelo jwa gago jo bo swang bo ile.”

117 Lekau leo le ne la re, “Moatlhodi!” Mme o ne a tlhakatlhakantsha tsamaiso ya kgotlatshekelo, fa a ne a tlolela ka kwa ga ditshegets a bo a wela fa dinaong tsa moatlhodi, ka lebaka la boutlwele botlhoko. O ne a re, “Moatlhodi, leba sefatlhego sa me! A wena ga o nkitse?”

O ne a re, “Nnyaya, morwa, ga ke dire.”

118 O ne a re, “O gakologelwa botshelo jwa mosimane yo o rileng yo monnye jo o bo pholositseng, dinyaga di le dintsi tse di fetileng, mo pitseng e e neng e taboga e tshabile?”

O ne a re, “Ee, ke a go gakologelwa.”

119 O ne a re, “Ke nna mosimane yoo.” O ne a re, “Moatlhodi, o ne wa mpholosa ka nako eo. Mpholose jaanong!”

120 Moatlhodi o ne a leba golo ko go ena, a bo a re, “Morwa, letsatsi lele ke ne ke le mopholosi wa gago. Gompiano nna ke moatlhodi wa gago.”

121 Gompiano Ena ke Mopholosi wa gago. Moleofi, kamoso A ka tswa a le Moatlhodi wa gago. A re go akanyeng gape jaanong, jaaka mmimo o tshameka. Mme mongwe le mongwe a rapela, bao ba ba nang le Modimo mo mafelong a go rapela.

122 Ke a ipotsa bosigong jono jaanong, ka bonako, bao ba ba batlang go amogela Keresete jaaka Mopholosi wa sebelebele, e reng, “Modimo, nkutlwele botlhoko, nna moleofi. Ke batla go tla fa Mading a a tsholotsweng. Ke lapisitswe ke go ipatakanya le dikereke le go taboga go tloga lefelong go ya lefelong. Ke batla go tsalwa gape. Ke batla maitemogelo mo pelong ya me gore ke a itse gore Keresete o ne a Itshenolela nna, ka tshenolo ya semowa e wena o fetsang go bua ka yona, Mokaulengwe Branham. Ke batla tshenolo ya semowa, Mowa o o Boitshupo mo pelong ya me, o ntshedisana, o tliša Keresete go nna wa popota go feta mo go nna go feta ka fa nna ke leng ka teng ka bonna. Ke eletsana maitemogelo ao, Mokaulengwe Branham. A wena o tliša nthapelela jaaka ke tsholetšana seatla sa me?” A wena o tliša tsholetšana seatla sa gago jaanong, wena yo o eletsana go gakologelwa. Modimo a go segofatše, mohumagadi. Modimo a go segofatše morago koo, mohumagadi. Moo go molemo. Modimo a go segofatše, rra. Moo go molemo. Tsholetšana diatla tša lone, jaanong tšwelelang le tlhatlogeng ka seatla sa gago.

123 O tliša tlhajwa ke ditlhong jang? A o ka gana se se jaaka Seo, tsala? Gakologelwa.

124 “Ao,” wa re, “Mokaulengwe Branham, bareri ba rerile ka dinyaga.” Ke a itse, fela lengwe la malatsi ano ba ile go khutla go rera. Mme tsela e dilo di lebegang ka yone, go ka nna gone jaanong. O ile go utlwa thero ya gago ya bofelo. Ka tshosologo, ena e ka tswa e le ya gago ya bofelo.

125 “Ao,” o a re, “Nna ke monnye.” Moo ga go tshwenye. Loso ga le gobebelele motho, kgotsa bogodi kgotsa bokgoni.

126 A wena jaanong o tlaa Mo amogela e le Mopholosi wa sebelebele sa gago, ka go tsholetsa seatla sa gago, o re, “Modimo, nkutlwele botlhoko?” Tsholetsa diatla tsa gago le botlhe ba bangwe bana, mme o re, “Jaanong ke batla go amogela Keresete.” A o tlaa tsholetsa seatla sa gago?

127 Mongwe yo o kgelogileng, e re, “Modimo, nkutlwele botlhoko. Ke batla go boela ko go Keresete bosigong jono, gore kamoso go tle go nne tsogo, seša, ya me.” A o tlaa tsholetsa diatla tsa gago? Tsholetsa seatla sa gago, o re, “Nkutlwele botlhoko. Ke batla go tla jaanong.” A o tlaa go dira? Tsholetsa seatla sa gago ko godimo, o re, “Ke nnile mokgelogi, fela bosigong jono...” Modimo a go segofatse, mohumagadi. Modimo a go segofatse. Moo go gontle. “Ke tlaa amogela Keresete e le Mopholosi wa sebelebele sa me. Ke tlaa Mo amogela bosigong jono. Ke kalakatlegetse kgakala le Modimo, dinyaga di le dintsi, fela jaanong nna ke tla gae.” A wena o tlaa Mo amogela bosigong jono, gore jona e tle e nne tsogo e ntšhwa ka ntšha ya gago, botshelo jwa gago jwa kgale bo fedile?

128 Mohumagadi yona o tla golo fa aletareng, go dira boipolelo jwa gagwe, go ema. Mongwe o sele yo o batlang go tsaya lefelo la gagwe fano, tlaa fa godimo fano le ena, mo boipobolong jwa bona? A o tlaa emelela, o bo o tla golo mo aletareng, le wena. Aletare e bulegile. Go tlhomame. Tlaya gone fa godimo, gone jaanong. Fa o batla go ema fano o bo o rapela, gone go tlaa nna fela mo go siameng. Tswelela o tle. A o tlaa tla? Mo godimo ga boipobolo jwa tumelo ya gago, mo godimo ga tumelo ya gago mo Morweng wa Modimo, a wena o tlaa tla jaanong? Go siame.

129 Go tswa mo go wena, o gakologelwe. Wena o yoo. A wena o moleofi? A wena o mokgelogi? A wena o tsidifitse ebile o kgakala le Keresete? A wena o batla go tsosiwa seša le Ena jaanong, o simolole botshelo seša? Ga tweng ka ga wena, monna le mosadi ba lo nnileng lo—ba lo nnileng lo sa tlhaloganyane lobaka lo lo leele, lo tlhatlharuana mo lolwapeng lwa lona? A lona lo ka seka lwa tla lwa bo lo tlhamalatsa selo seo le Modimo le lona ka bolona jaanong? Dirang Paseka e nne Paseka ya nnete ya lona, simololang lelwapa le leša.

130 Ga tweng ka ga wena yo o iseng a nne, yo o iseng o nne le thapelo mo lolwapeng la gago, wena fela o ya gae go tswa kerekeng o bo o leka go tshela mo go botoka go feta thata ka fa o ka kgonang ka teng, ga o ke o tliša lelwapa ga mmogo le rapele?

Moo ke lebaka le re nang le botlhoka tsebe ja banana le dilo tse re nang natso. Moo ke lebaka le magae a Maamerika a thubegileng. A lona lo ka se tle, lo simolole seša bosigong jono? A lo tlaa go dira? Lona lo laleditswe. Gakologelwa, nna ke modiredi wa lona jaanong; ke tlaa bo ke le mopaki mo letsatsing leo.

Fa re santse re tshotse ditlhogo tsa rona di obamisitswe, ka lebaka leo, jaanong ka ntlha ya thapelo.

¹³¹ Rraetsho yo o Segofetseng wa Legodimo, bosigong jono re tliša bareetsi bano ko go Wena, mo tlišoafalong e e boitshepo e e tlišoafetseng go feta thata e re itseng ka foo re ka dirang. Ka boikobo re atamela Terone ya Gago. Mme morago ga Molaetsa bosigong jono, gore, go tšennngweng mo phuphung mo go golo moo, Ena ga a ke a dula a didimetse, mowa wa Gagwe wa botho o ne wa tšwelelela gone ka ko mafelong a bo a wetsa tiro ya Modimo, e Ena a neng a laoletse go e dira. Mme kamoso maphakela, re fitlhela kwa A neng a tsamaya go ralala magato a a kwa godimo, a fenya sengwe le sengwe, mo tsogong ya Gagwe. Fela O ne a tswa mo mosong wa Paseka ka ntlha ya tšhiamiso ya rona. Mme rona re fitlhela gore O rometse Mowa o o Boitshepo morago, go atlholela batho boleo.

¹³² Mme re a rapela bosigong jono, Morena, gore bao ba ba tšholeditseng diatla tsa bona ba tle ba gakologelwe fa pele ga Gago. Mma tšhwetso ya bona e nne go tloga fa pelong ya bona bosigong jono, gore ba ne ba Go amogela, ba bo ba Go dumela, mme mma ba kanelelwe ka Sekano sa tšholofetso bosigong jono, Mowa o o Boitshepo. Go dumelele, Rara. Gonne, re ba neela ka tlišoafalo ko go Wena, ka Molaetsa ona bosigong jono. Mma O segofatse bao ba ba O utlwileng, bao, Morena, ba ba tlaa O tsayang le bone go ya magaeng a bona, mme ba O tebetse mo tengteng ga dipelo tsa bona. Mma ba tšhele ka Lefoko la Modimo. Go dumelele, Rara, gonne re go kopa mo Leineng la Keresete. Amen.



GO TSENYA MO PHUPUNG TSW57-0420
(The Entombment)

TATELANO YA TSA TSOSOLOSO YA PASEKA

Molaetsa o ka Mokaulegwe William Marrion Branham o rerilwe la ntlha ka Sekgowa mo maitseboeng a Lamatthatso, Moranang 20, 1957, kwa Motlaaganeng wa Branham mo Jeffersonville, Indiana, U.S.A. O tserwe mo theiping ya makenete mme wa gatsiwa ka Sekgowa o sa khutswafadiwa. Phuthololo e ya Setswana e ne ya gatsiwa le go abiwa ke ba Voice Of God Recordings.

TSWANA

©2018 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Kitsisô ka tetlokhopi

Ditshiamelo tsoatlhe di sireleditswe. Buka e e ka gatsiwa fa motšhineng wa go gatisa wa ka fa lelapêng gore e dirisiwe ka namana kgotsa gore e abêlanwe, go se tuêdisô epê, e le sedirisiwa sa go gasa Efangele ya Jesu Keresete. Buka e ga e ka ke e rekisiwe, e boelediwe ka bontsi, e baiwe fa webosaeteng, e bolokiwe mo mofuteng oo e ka tlhagisiwang gape ka one, e fetolêlwe go maleme a mangwe kgotsa e dirisiwe go kgobokanya madi kwa ntle ga tetla e e kwadilweng ya Voice Of God Recordings®.

Go ka bolêlêlwa go feta fa kgotsa go ka itse ka dilo tse dingwe tse di leng têng, tswêêtswêê, ikamanye le ba ga:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org